

derung Weltlicher Königreichen vnd Regimen-
ten/vnd anderen dergleichen wunderbarlichen/hohen
notwendigen dingen. Welche Träum auch Gott
der Herr zu jeder zeit mit besondern herrlichen zeug-
nissen bestätigt hat / anzuzeigen / daß sie nit ohn ge-
fahr/auch nicht auß natürlichen vrsachen/sonder vom
oben herab/gewißlich herkommen.

Solche Träum seynd gewesen alle die/ so in heyl-
gen Göttlichen Schrifften gegründet seynd/ Als der
Traum Jacobs / Josephs / Pharaonis/ Dantelis/
Nabuchodonosors vnd anderer.

Von Sathanischen oder Teuffe- lischen Träumen.

Im vierten seynd noch andere Träum/so da Sa-
tanische oder Teuffelische/vnd des bösen Geists
Träum mögen genant werden: Die der Teuffel vor
zeiten in den Heyden/vnd zu diser zeit in den vngläu-
bigen allerhand würcket.

Vnd liest man in den Historiis/ das vorzeiten die
Heyden/damit sie solche Träum haben möchten/sür
ihre Abgöttern/ eingewicklet in die Haut der auffge-
opfferten Thier/gelegen seynd/vnd geschlafen haben.

Wie auch auff den heutigen tag der Satan solche
betriegende Träum den genannten Widertäuffern/
vnd andern Schwermern / die im verborgenen auff
solche offenbarungen warten / dergleichen den Zau-
berern vnd Hexen/auch allen so ohn ware bekehrung
zu Gott/seiner Tyrannie vnterworffen seynd / ein-
gibt/doch vmb der vrsach willen/daß er allerhand jae-
mer/ als Todschlag / Aufruhr/vntertruckung rech-